

## Rapport dalla sessiun dil cussegl da vischunaunca dils 17-10-2022

### Tractanda 1

### Approbaziun dil protocol dalla sessiun dils 16-08-2022

Il protocol dalla sessiun dils 16 d'uost 2022 vegn approbaus cun engraziament.

### Tractanda 2

### Damonda da credit per la sanaziun dalla via Campliun – Caltgadira

La via da Nossadunna ei vegnida construida ils onns 1956 tochen 1959 en connex cun la construcziun da lavineras e dalla emplontaziun a Munt. Igl onn 1981 ei la via vegnida catramada. Ils davos 40 onns ha ei dau neginas lavurs da sanaziun vid quella via. La via existenta corrispunda arisguard ladezia, purtontedad e segirtad buca pli allas pretensiuns dad oz il di. La cuvrida ei en schliet stan e la deflussiun dallas auas funcziuna buca pli ni maunca per part schizun diltut. La via ei memia stretga per las novas maschinas agricolas e buca adattada per las aultas peisas.

Il project da sanaziun ei partius en duas parts. Igl onn 2023 vegn sanau il tschancun naven dil rempar tochen Caltgadira. Igl onn 2024 la part giudem naven dalla spartida dalla Via Principala/Via Carmanera tochen sut il rempar. La via nova survegn ina ladezia da 3 meters. El territori dil vitg vegn la ladezia existenta da 4 meters mantenida. Sin la grada avon Caltgadira ei prevediu da construir loghens d'untgida. Per slargiar la via drova ei muort la tessaglia sin entgins tschancuns mirs e construcziuns da sustegn.

Ils cuosts pigl entir project importan tenor calculaziun digl inschignier frs. 2'640'000.- inclus taglia sin plivaleta.

**Cun 14 : 0 conceda il cussegl da vischunaunca il credit da frs. 2'640'000.- per la sanaziun dalla via Campliun - Caltgadira cun resalva dalla votaziun all'urna (art. 30 alinea d constituziun communal).**

### Tractanda 3

### Approbaziun dall'ordinaziun da funs

Il cudisch funsil Cadi ha entschiet igl onn 2019 cun las lavurs per l'introducziun dil register funsil federal sigl intschess da nossa vischunaunca. Principalmein va ei per purificar servituds. Per che buca mintga singul dretg che vegn basignaus per la cultivaziun da terren stoppi vegnir impurtaus el cudisch funsil, ha la suprastanza communalia decidiu sin cussegl dallas persunas dil fatg da relaschar ina ordinaziun da fons. En quella ordinaziun vegn resumadamein stipulau suandon: Maunca ad in bein immobiliar la via necessaria per la cultivaziun agricola sco colligiazion tier ina via publica ni tier ina via da fons, vala per quei bein il dretg da transitar e da carrar ils beins immobiliars vischinonts per la cultivaziun agricola (cultivaziun e raccolta).

**Il cussegl da vischunaunca approbescha cun 13 : 0 vuschs ed ina abstensiun l'ordinaziun da fons cun la resalva dall'approubaziun entra la radunanza communalia (art. 33 al. c constituziun communal).**

#### Tractanda 4

#### Elezziun d'ina cumissiun predeliberta per la reorganisaziun dalla dismessa da rumians

La situaziun cun las deponias da rumians en vischunaunca ei per la suprastonza communalia buca pli cuntenteivla. Principalmein sto vegnir anflau ina alternativa per la deponia da rumians a Caltgeras. Leu vegn oz rimnau - sper rumien da casa ordinari - cuppas, veider, pet, ieli e vestgadira. La casa da rumians ed ils containers sut via Principala fan ina schiliata pareta e corrispundan per part buca pli al standard dad oz. Vinavon ha ei dau il davos temps pliras damondas, schebein la vischunaunca fusi promta da rimnar plastic, pupi e cartun. Ulteriuramein eisi da far patratgs cu remplazzar tgei casa da rumians entras il niev sistem da molocs. Igl uffeci d'ambient dil cantun Grischun pretenda gia dapi entgins onns ina autra sligiaziun per la deponia da verd. La deponia da verd actuala ei buca conforma alla zona e sesanfla memia datier dil rein.

Il cussegl da vischunaunca elegia suandontas persunas en la cumissiun predeliberta per la reorganisaziun dalla dismessa da rumians:

Lucas Arpagaus

Albert Spescha

Claudio Thalmann

Clemens Bundi

Mario Lechmann

#### Tractanda 5

#### Verificaziun dils resultats dalla votaziun communalia dils 25-09-2022

Cusseglier Andreas Küttel declara che Claudio Thalmann ed el hagien sco commembers dalla cumissiun per verificaziun da votaziuns controllau ils resultats dalla votaziun communalia dils 25 da settember 2022 ed anflau tut en uorden. En num dalla cumissiun propona Andreas Küttel da verificar ils resultats publicai.

**En votaziun unanima verifichescha il cussegl ils resultats publicai dalla votaziun communalia dils 25-09-2022.**

#### Tractanda 6

#### Pusseivladad da tschentar damondas

Dalla pusseivladad da tschentar damondas vegn fatg diever.

**Per il cussegl da vischunaunca**

Il president

Mario Lechmann

La actuara

Sandra Gautschi